

CONVENIO DE COOPERACIÓN EDUCATIVA ENTRE A CONSELLERÍA DE EDUCACIÓN, CIENCIA, UNIVERSIDADES E FORMACIÓN PROFESIONAL E A UNIVERSIDADE DE SANTIAGO DE COMPOSTELA PARA A IMPARTICIÓN POR PARTE DESTA ENTIDADE DA FORMACIÓN PEDAGÓXICA E DIDÁCTICA PARA IMPARTIR DOCENCIA NAS ENSINANZAS DE FORMACIÓN PROFESIONAL

Santiago de Compostela, 5 de xuño de 2025

REUNIDOS

Dunha parte, D. Román Rodríguez González, conselleiro de Educación, Ciencia, Universidades e Formación Profesional, en virtude do seu nomeamento a través do Decreto 44/2024, do 14 de abril, polo que se nomean os titulares das consellerías da Xunta de Galicia, que actúa de conformidade coas facultades que lle atribúe o artigo 34 da Lei 1/1983, do 22 de febreiro, de normas reguladoras da Xunta e da súa Presidencia.

Doutra, D. Antonio López Díaz, reitor magnífico da Universidade de Santiago de Compostela (en diante, USC), que actúa en nome e representación dela en virtude do Decreto 35/2022, do 17 de marzo (DOG do 22 de marzo), do seu nomeamento, polas facultades conferidas pola Lei orgánica 2/2023, do 22 de marzo, do sistema universitario, e polo Decreto 14/2014, do 30 de xaneiro, polo que se aproban os estatutos da USC.

Interveñen en función dos seus respectivos cargos e en exercicio das facultades que para convir en nome das entidades que representan teñen conferidas.

EXPOÑEN

I. A Lei orgánica 2/2006, do 3 de maio, de educación (LOE) establece que para impartir ensinanzas de formación profesional se esixirán os mesmos requisitos de titulación e formación establecidos para a educación secundaria obrigatoria e o bacharelato, é dicir,

será necesario ter o título de licenciado, enxeñeiro ou arquitecto, ou o título de grao equivalente, ademais da formación pedagóxica e didáctica de nivel de posgrao, de acordo co disposto no artigo 100 da citada lei, sen prexuízo da habilitación doutras titulacións que, para efectos de docencia puidese establecer o Goberno para determinados módulos, logo de consulta ás comunidades autónomas. Establece, así mesmo, que para exercer a docencia nas diferentes ensinanzas reguladas nela, será necesario estar en posesión das titulacións académicas correspondentes e ter a formación pedagóxica e didáctica que o Goberno estableza para cada ensinanza, e que lles corresponde ás administracións educativas establecer os convenios oportunos coas universidades para a organización da formación pedagóxica e didáctica indicada.

II. A Orde ECI/3858/2007, do 27 de decembro (BOE do 29 de decembro), establece os requisitos para a verificación dos títulos universitarios oficiais que habiliten para o exercicio das profesións de profesor de educación secundaria obrigatoria e bacharelato, formación profesional e ensinanzas de idiomas

III. A Orde EDU/2645/2011, do 23 de setembro, establece e regula a formación equivalente á formación pedagóxica e didáctica esixida para aquelas persoas que estando en posesión dunha titulación declarada equivalente para efectos de docencia non poden realizar os estudos de máster.

IV. O Real decreto 592/2014, do 11 de xullo (BOE do 30 de xullo), regula as prácticas académicas externas dos estudantes universitarios.

V. A Consellería pretende que aquelas persoas que posúan unha titulación declarada equivalente para efectos de docencia e non poidan acceder aos estudos de máster regulados pola Orde ECI/3858/2007 poidan realizar o curso obxecto deste convenio para poder impartir docencia nos termos previstos na normativa vixente.

VI. A USC imparte un título propio denominado Curso de formación continua en formación pedagóxica e didáctica do profesorado especialista en sectores singulares da formación profesional (en diante, Curso de formación continua), así denominado para axustarse ao establecido na Lei orgánica 3/2022, do 31 de marzo, de ordenación e integración da formación profesional, aprobado polo Consello de Goberno da USC con data 25 de xuño de 2024, que se axusta integramente ao programa recollido na Orde EDU/2645/2011, do 23 de setembro.

VII. Que, de acordo co arriba exposto, as partes, co fin de formalizar os termos e condicións da impartición da citada formación, acordan subscribir este convenio de cooperación educativa, que se rexerá polas seguintes:

CLÁUSULAS

Primeira. Obxecto e natureza do convenio

Este convenio ten por obxecto organizar o recoñecemento e certificación dos estudos ofertados por parte da USC para impartir a formación equivalente á formación pedagóxica e didáctica esixida na LOE, para aquelas persoas que por razóns derivadas da súa titulación non poidan acceder aos estudos de máster regulados pola Orde ECI/3858/2007, pola que se establecen os requisitos para a verificación dos títulos universitarios oficiais que habiliten para o exercicio das profesións de profesor, entre outras, de formación profesional, nos centros sostidos con fondos públicos na Comunidade Autónoma de Galicia.

Segunda. Impartición das ensinanzas

O Curso de formación continua será impartido como título propio da USC, segundo o establecido na Orde EDU/2645/2011, do 23 de setembro.

Terceira. Regulación do Prácticum

O Curso de formación continua incluirá, tal como se establece no anexo II da Orde EDU/2645/2011, do 23 de setembro, un módulo de Prácticum para cuxa realización a USC contará coa colaboración da Consellería.

A realización do Prácticum axustarase ao previsto no Real decreto 592/2014, do 11 de xullo, polo que se regulan as prácticas académicas externas dos estudantes universitarios, publicado no BOE núm. 184, do 30 de xullo de 2014, que se recolle no anexo I deste convenio, así como aos protocolos que se acorden entre as universidades e a Consellería ao respecto.

Cuarta. Relación entre a entidade e o alumnado en prácticas

1. Das prácticas externas curriculares e extracurriculares non se derivarán as obrigas propias dun contrato laboral e tampouco terán ningunha dotación económica obrigatoria por parte da entidade, aínda que se poderá prever una asignación para o/a alumno/a en concepto de bolsa ou axuda ao estudo. Neste caso, a entidade deberá das de alta na Seguridade Social o alumnado e cotizar por el nos termos previstos no Real decreto-lei 2/2023, do 16 de marzo, de medidas urxentes para a ampliación de dereitos dos pensionistas, a redución da brecha de xénero e o establecemento dun novo marco de sustentabilidade do sistema público de pensión e a normativa que o desenvolva.
2. No caso de prácticas externas curriculares e extracurriculares non remuneradas, a USC asumirá a cotización e a tramitación da alta dos/as estudantes mentres se manteña en vigor a disposición adicional 34 do Real decreto-lei 2/2023, do 16 de marzo, polo que se modifica a disposición adicional 52 do texto refundido da Lei xeral da Seguridade Social, aprobado polo Decreto legislativo 8/2015, do 30 de outubro.
3. A entidade poderá interromper as prácticas cando considere que o alumnado vulnerou gravemente as súas obrigas, o que lle comunicará á persoa que fose designada como titora por do centro da USC.

4. A realización das prácticas non supón en ningún caso o establecemento dun vínculo laboral coa entidade. O alumnado e a entidade non poderán subscribir ningunha relación contractual, nin sequera baixo as modalidades de contrato en prácticas ou para a formación, previstas no artigo 11 do Real decreto legislativo 2/2015, do 23 de outubro, polo que se aproba o texto refundido da Lei do estatuto dos traballadores. Xa que logo, o/a estudante que se acolla a este réxime de prácticas queda excluído da lexislación laboral.

5. Se o/a estudante se incorpora á entidade ao acabar os seus estudos, o tempo de prácticas non computará para os efectos de antigüidade nin eximirá do período de proba, agás que o convenio colectivo de aplicación estipule algo distinto.

6. O que dispón esta cláusula aplicaráselles ás prácticas que se realicen de acordo con este convenio desde o día 1 de xaneiro de 2024.

7. A maiores do indicado nos puntos anteriores deste artigo, a USC ten subscrito un seguro de responsabilidade civil e outro de accidentes, complementarios ao seguro escolar.

Quinta. Certificacións e recoñecementos

Unha vez superados estes estudos, a USC expedirá o título que corresponda segundo a súa normativa; con base neste título, a Consellería emitirá un certificado oficial, con validez en todo o territorio nacional, segundo as especificacións indicadas no anexo I da Orde EDU/2645/2011, do 23 de setembro, no que conste expresamente a posesión da formación pedagóxica e didáctica equivalente á esixida no artigo 100.2 da LOE.

Para a xestión desta certificación, a USC remitiralle á Consellería unha certificación coa relación do alumnado que supere a formación e, pola súa vez, a Consellería remitiralle á USC os certificados correspondentes para a súa distribución

Sexta. Comisión de seguimento

1. Para o seguimento da execución deste convenio e a realización das propostas de modificación e desenvolvemento del que se consideren oportunas constituirase unha comisión de representantes da Consellería e da USC, coa seguinte composición:

- Pola Consellería: tres persoas nomeadas polo conselleiro.
- Pola USC: tres persoas nomeadas polo reitor.

2. A comisión de seguimento asumirá o compromiso de levar a bo fin os obxectivos que xustifican a sinatura deste convenio. Serán as súas funcións:

- Con carácter xeral, a interpretación e aplicación das estipulacións deste convenio, así como velar polo seu cumprimento.
- Propoñer para a súa aprobación polos órganos competentes addendas ou modificacións deste convenio.

Sétima. Valoración económica

A realización deste convenio non supón gasto ningún para as institucións asinantes, polo que non se precisa dotación orzamentaria.

Oitava. Protección de datos de carácter persoal

1. Os datos persoais recadados neste procedemento serán tratados na súa condición de responsable pola Xunta de Galicia - Educación, Ciencia, Universidades e Formación Profesional coa finalidade de levar a cabo a tramitación administrativa que se derive da xestión deste procedemento e a actualización da información e contidos do seu expediente persoal.

2. Co fin de darlle a publicidade exixida ao procedemento, os datos identificativos das persoas interesadas serán publicados conforme o descrito na presente norma reguladora a través dos distintos medios de comunicación institucionais de que dispón a Xunta de Galicia como son os diarios oficiais, páxinas web e os taboleiros de anuncios.

3. As persoas interesadas poderán acceder, rectificar e suprimir os seus datos, así como exercer outros dereitos ou retirar o seu consentimento, a través da sede electrónica da Xunta de Galicia ou presencialmente nos lugares e rexistros establecidos na normativa reguladora do procedemento administrativo común, segundo se explicita na información adicional recollida en <https://www.xunta.gal/proteccion-datos-persoais>.

4. No caso de existir diferentes referencias normativas en materia de protección de datos persoais neste procedemento, prevalecerán en todo caso aquelas relativas ao Regulamento (UE) 2016/679, xeral de protección de datos.

Novena. Rexistro de convenios

A sinatura deste convenio suporá o consentimento expreso da USC para incluír e facer públicos os datos referidos ao convenio, de conformidade coa Lei 1/2016, do 18 de xaneiro, de transparencia e bo goberno, e co Decreto 126/2006, do 20 de xullo, polo que se regula o rexistro de convenios da Xunta de Galicia.

Décima. Causas de resolución

1. Son causas de resolución deste convenio:

- a) O transcurso do prazo de vixencia sen acordarse a súa prórroga.
- b) O transcurso do seu prazo máximo de vixencia, incluído o período de prórroga establecido nel.
- c) O acordo unánime das partes.
- d) O incumprimento das obrigas e compromisos asumidos por parte dalgún dos asinantes.
- e) Por decisión xudicial declaratoria da súa nulidade.
- f) Calquera das causas recollidas na normativa da USC sobre prácticas externas.

2. Se no momento da resolución algún ou algunha estudante estivese realizando prácticas, continuará estas ata o remate establecido.

3. Coa sinatura deste convenio queda derogado calquera outro que coa mesma finalidade asinasen as partes.

Décimo primeira. Normativa aplicable e xurisdición

Este convenio ten carácter administrativo e os seus efectos rexeranse polo establecido nas súas cláusulas, e quedará suxeito ao disposto polo Acordo da Xunta de Galicia, do 27 de marzo de 1991, sobre convenios de cooperación con outros entes públicos e de colaboración con particulares, feito público pola Resolución da Consellería de Economía e Facenda, do 8 de abril de 1991.

Aínda que é un dos excluídos do ámbito de aplicación da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, segundo especifica o seu artigo 4, ao non previsto aplicaráselle os principios recollidos na citada lei, co fin de resolver as dúbidas e omisións que puidesen presentarse.

A xurisdición contencioso administrativa será a competente para dirimir as cuestións que puidesen xurdir da aplicación deste convenio.

Décimo segunda. Vixencia

Este convenio estará vixente desde o día da súa sinatura e terá duración máxima de 4 anos desde esa data, de acordo co establecido no artigo 49 h) da Lei 40/2015, do 1 de outubro, de réxime xurídico do sector público, salvo denuncia expresa dunha das partes asinantes cunha notificación á outra con dous meses de antelación.

Antes da finalización do citado prazo de vixencia, as partes poden acordar por unanimidade a súa prórroga por un período de catro anos adicionais.

Esta duración está condicionada a que este curso de posgrao propio figure nos plans de estudos da USC, e non se desenvolva a disposición adicional undécima da Lei orgánica

3/2020, do 29 de decembro, pola que se modifica a Lei orgánica 2/2006, do 3 de maio, de educación (Lomloe).

E, en proba de conformidade, as partes asinan este convenio dixitalmente.

O conselleiro de Educación, Ciencia,
Universidades e Formación Profesional
Román Rodríguez González

O reitor da Universidade de Santiago
de Compostela
Antonio López Díaz

ANEXO I

REGULACIÓN DO PRÁCTICUM DO CURSO PROPIO DA USC "FORMACIÓN CONTINUA" EN CENTROS DEPENDENTES DA CONSELLERÍA DE EDUCACIÓN, CIENCIA, UNIVERSIDADES E FORMACIÓN PROFESIONAL SOSTIDOS CON FONDOS PÚBLICOS, DE ACORDO CO ESTABLECIDO NO REAL DECRETO 592/2014, DO 11 DE XULLO (BOE DO 30 DE XULLO) QUE REGULA AS PRÁCTICAS ACADÉMICAS EXTERNAS DOS ESTUDANTES UNIVERSITARIOS.

Obxecto

As prácticas académicas externas curriculares (Practicum) de estudos incluídas no título propio da USC denominado Curso de formación continua teñen por obxecto facilitar a preparación para o exercicio profesional daquelas persoas que posúan unha titulación declarada equivalente para efectos de docencia e non poidan acceder aos estudos de máster regulados polo Orde ECI/3858/2007 co obxecto de promover o futuro desenvolvemento profesional e o acceso á docencia do indicado colectivo.

Carácter

Dado o carácter formativo dos Practicum, da súa realización non se derivarán en ningún caso abrigas propias dunha relación laboral nin o seu contido poderá dar lugar á substitución da prestación laboral propia de postas de traballo.

Réxime

A USC axustarase á normativa vixente en cada momento para tramitar, xestionar e difundir as prácticas académicas externas nos estudos de grao, en particular o desenvolvemento destas aterase ao establecido no Real decreto 592/2014, do 11 de xullo, polo que se regulan as prácticas académicas externas dos estudantes universitarios (BOE do 30 de xullo de 2014).

A adscrición do alumnado que vai realizar as prácticas deberá facerse de acordo cos criterios fixados polas persoas responsables universitarias da titulación do título propio Curso de formación continua, nos centros educativos dependentes da Consellería, en relación con esta titulación.

Para isto, os centros universitarios realizarán unha convocatoria pública entre o colectivo ao que se dirixen as prácticas, na que se indicará o número de alumnos/as de prácticas e as condicións da práctica académica externa, garantindo os principios de transparencia, publicidade e igualdade de oportunidades.

Persoas beneficiarias e requisitos

Para realizar o Practicum no título propio Curso de formación continua o alumnado deberá estar matriculado/a neste título propio.

Programa das prácticas

O programa de prácticas académicas desenvolverase conforme os seguintes termos:

1. A duración das prácticas externas será a que estableza o plan de estudos correspondente nos termos establecidos polo artigo 12.6 do Real decreto 1393/2007, do 29 de outubro, polo que se establece a ordenación das ensinanzas universitarias oficiais.
2. O alumnado contará cunha persoa titora da Consellería e con outra das facultades correspondentes para realizar as prácticas.
3. O proxecto formativo no que se concreta a realización de cada práctica académica externa fixará os obxectivos educativos e as actividades que se desenvolverán.

Dereitos e deberes

- Da persoa titora do centro colaborador

1. Dereitos

- a. Ao recoñecemento da súa actividade colaboradora por parte da USC, cunha certificación acreditativa do traballo realizado, en función dos termos establecidos por esta, e por petición do interesado.
- b. A ser informado da normativa que regula as prácticas externas así como do proxecto formativo e das condicións do seu desenvolvemento.
- c. Ter acceso á USC para obter a información e o apoio necesarios para o cumprimento dos fins propios da súa función.

2. Deberes

- a. Acolloer o/a estudante e organizar a actividade a desenvolver de acordo co establecido no proxecto formativo.
- b. Supervisar as súas actividades, orientar e controlar o desenvolvemento da práctica cunha relación baseada no respecto mutuo e o compromiso coa aprendizaxe.
- c. Informar o/a estudante da organización e funcionamento da entidade e da normativa de interese, especialmente a relativa á seguridade e riscos laborais.
- d. Coordinar coa persoa titora académica da usc o desenvolvemento das actividades establecidas, incluíndo aquelas modificacións do plan formativo que poidan ser necesarias para o normal desenvolvemento da práctica, así como a comunicación e resolución de posibles incidencias que puidesen xurdir no desenvolvemento dela e o control de permisos para a realización de exames.

- e. Emitir un informe final que lle remitirá ao titor/a académico/a da USC á conclusión das prácticas, que recollerá o número de horas realizadas polo/a estudante e no cal poderá valorar aspectos referidos, de ser o caso, tanto ás competencias xenéricas como ás específicas, previstas no correspondente proxecto formativo.

- Da persoa titora académica da USC

1. Dereitos

- a. Ao recoñecemento efectivo da súa actividade académica nos termos que estableza a USC de acordo coa súa normativa interna.
- b. A ser informado da normativa que regula as prácticas externas así como das condicións baixo as que se desenvolverá a estancia do/a estudante que se tutelarán.
- c. Ter acceso ao centro educativo para o cumprimento dos fins propios da súa función, e a aquela información imprescindible para o exercicio da súa actividade.

2. Deberes

- a. Velar polo normal desenvolvemento do proxecto formativo, garantindo a compatibilidade do horario de realización das prácticas coas obrigas académicas, formativas e de representación e participación do/a estudante e de asistencias a actividades de avaliación doutras materias.
- b. Facer un seguimento efectivo das prácticas coordinándose para iso coa persoa titora da entidade colaboradora e vistos, de ser o caso, os informes de seguimento.
- c. Autorizar as modificacións que se produzan no plan de traballo.
- d. Levar a cabo o proceso avaliador das prácticas dos/as estudantes tutelados de acorde cos procedementos que establece a USC cubrindo o correspondente informe de avaliación.

- e. Gardar confidencialidade en relación con calquera información que coñeza como consecuencia da súa actividade como persoa titora.
- f. Informar o órgano responsable das prácticas externas nas facultades correspondentes das posibles incidencias xurdidas.
- g. Supervisar e, de ser o caso, solicitar a adecuada disposición dos recursos de apoio necesarios para asegurar que os estudantes con discapacidade realicen as súas prácticas en condicións de igualdade de oportunidades, non discriminación e accesibilidade universal.

- Dos/das estudantes en prácticas

1. Dereitos

- a. Á tutela, durante o período de duración da correspondente práctica, por un/unha docente do centro no que cursa os estudos de grao e por un/unha profesional que preste servizos nos centros dependente da Consellería onde se realice.
- b. Á avaliación de acordo cos criterios establecidos pola USC.
- c. Á obtención dun informe por parte da entidade colaboradora onde realizaron as prácticas, con mención expresa da actividade desenvolvida, a súa duración e, de ser o caso, o seu rendemento.
- d. A cumprir coa súa actividade académica, formativa e de representación e participación, previa comunicación con antelación suficiente á entidade colaboradora.
- e. A dispoñer dos recursos necesarios para o acceso dos/das estudantes con discapacidade á tutela, á información, á avaliación e ao propio desempeño das prácticas en igualdade de condicións.
- f. A conciliar, no caso dos/das estudantes con discapacidade, a realización das prácticas con aquelas actividades e situacións persoais derivadas ou conectadas coa situación de discapacidade.
- g. Aqueloutros, de ser o caso, previstos na normativa da USC.

2. Deberes

- a. Cumprir a normativa vixente relativa a prácticas externas establecida pola USC
- b. Coñecer e cumprir o proxecto formativo das prácticas seguindo as indicacións do titor/a asignado/a pala entidade colaboradora baixo a supervisión do titor/a académico/a da USC.
- c. Manter contacto co/coa titor/a académico/a da USC durante o desenvolvemento da práctica e comunicarlle calquera incidencia que poida xurdir nela, así como facer entrega dos documentos e a memoria final que lle sexan requiridos.
- d. Incorporarse á entidade colaboradora de que se trate na data acordada, cumprir o horario previsto no proxecto educativo e respectar as normas de funcionamento, seguridade e prevención de riscos laborais dela.
- e. Desenvolver o proxecto formativo e cumprir con dilixencia as actividades acordadas coa entidade colaboradora conforme ás liñas establecidas nel.
- f. Elaboración da memoria final das prácticas na que deberá figurar, entre outros, os seguintes aspectos: datos persoais do/a estudante; entidade colaboradora onde realizou as prácticas e lugar; descrición concreta e detallada das tarefas; traballos desenvolvidos e departamentos da entidade aos que estivo asignado; valoración das tarefas desenvolvidas cos coñecementos e competencias adquiridos en relación cos estudos universitarios; relación dos problemas suscitados e o procedemento seguido para a súa resolución; identificación das achegas que, en materia de aprendizaxe, supuxeron as prácticas; avaliación das prácticas e suxestións de mellora.
- g. Gardar confidencialidade en relación coa información interna da entidade colaboradora e gardar segredo profesional sobre as súas actividades, durante a súa estancia e finalizada esta.

- h. Mostrar, en todo momento, unha actitude respectuosa cara á política da entidade colaboradora, salvagardando o bo nome da universidade á que pertence.

Certificacións e recoñecementos

Ao finalizar as prácticas, a USC entregaralle a cada estudante un certificado que conterà como mínimo os seguintes aspectos:

1. Titular do documento.
2. Entidade colaboradora onde se realizaron as prácticas.
3. Descrición da práctica especificando a súa duración e datas de realización.
4. Actividades realizadas.

A persoa titora da entidade colaboradora recibirá unha certificación da USC de recoñecemento polo labor realizado. A USC remitiralle ao Servizo de Programas de Formación unha certificación coa relación do profesorado dos centros sostidos con fondos públicos que colaboraron durante o curso como tutores/as de prácticas, para os efectos do establecido no artigo 39 de Orde do 14 de maio de 2013 pola que se regula a convocatoria, o recoñecemento, a certificación e o rexistro das actividades de formación permanente do profesorado en Galicia.

Coa finalidade de manter en todo momento o rexistro de estudantes participantes baixo este convenio, aqueles centros ou servizos nos que se realicen as prácticas comunicaranlle á facultade á que estean adscritos os/as alumnos/as calquera alta ou baixa que se produza. Xunto á alta de cada estudante, comunicarán tamén a data do comezo e finalización das prácticas, o período de vacacións, se o houberse, o lugar do desenvolvemento e o seu contido.

Responsabilidade das actuacións

A realización das prácticas non implica relación contractual laboral, ou de calquera outro tipo, entre o alumnado que vaia desenvolver as actividades contidas no programa de formación práctica e a Consellería, de tal xeito que non se lle poderá esixir responsabilidade ningunha, nin directa nin subsidiariamente, polos actos e feitos acaecidos no desenvolvemento das prácticas.